



KOD ETIKA PERUBATAN DALAM ISLAM

KEMENTERIAN KESIHATAN MALAYSIA

KOD ETIKA AMALAN PERUBATAN DALAM ISLAM

1. Pengenalan

Perkembangan bidang perubatan dan sains pada masa ini telah melalui proses revolusi dan mencapai kemajuan di dalam teknologi perubatan. Kemajuan ini perlu dimanfaatkan untuk kebajikan manusia dan perlu dibimbing agar tidak disalah guna pada masa akan datang di samping memastikan ilmu ini mengikut acuan yang ditetapkan oleh syarak.

2. Profesion Perubatan dan Perkhidmatan Kesihatan

- 2.1 Profesion perubatan adalah satu keperluan dalam masyarakat.
- 2.2 Menyediakan perkhidmatan perubatan merupakan satu Fardu Kifayah ke atas masyarakat yang boleh disempurnakan oleh masyarakat atau individu yang mempelajari ilmu perubatan.
- 2.3 Amalan perubatan adalah satu ibadat dan kebajikan selain daripada kerjaya untuk mencari rezeki.
- 2.4 Menjaga nyawa dan akal adalah prinsip Maqasid Syariah yang boleh dicapai melalui penjagaan kesihatan.

3. Ciri-ciri Pengamal Perubatan

3.1 Ciri-ciri seorang pengamal perubatan seperti berikut :

- 3.1.1 Mempunyai ilmu perubatan dan diiktiraf untuk mengamal.
- 3.1.2 Orang yang percayakan Allah.
- 3.1.3 Menunaikan hak-hak Allah.
- 3.1.4 Menyedari keagungan Allah.
- 3.1.5 Mentaati perintah Allah.

- 3.1.6 Menjauhi larangan Allah dan mematuhi perintah Allah ketika bersendirian atau di khalayak ramai.
- 3.1.7 Mempunyai sikap bijaksana dan boleh menjadi penasihat.
- 3.1.8 Menjadi seorang yang tenang dan tidak gopoh.
- 3.1.9 Menyedari bahawa nyawa adalah milik Allah.
- 3.1.10 Mempamerkan teladan yang baik.
- 3.1.11 Jujur dalam apa jua keadaan dan situasi.
- 3.1.12 Mempunyai ilmu pengetahuan berkaitan hukum, ibadah dan asas ilmu fiqh
- 3.1.13 Mengelak dari menggunakan ubat-ubatan atau cara terapi yang diharamkan oleh Islam.
- 3.1.14 Penggerak kepada perintah Allah supaya nyawa dan kesihatan dipelihara.
- 3.1.15 Sentiasa mengikut perkembangan semasa kemajuan sains dan pembaharuan
- 3.1.16 Pengamal perubatan mesti menjaga kerahsiaan pesakit sepanjang masa.
- 3.1.17 Mengetahui bahawa mendalami ilmu di dalam Islam mempunyai dua tujuan:-
 - a. Hubungan di antara pengamal perubatan.
 - b. Hubungan pengamal perubatan dengan pesakit.

a. Hubungan di antara pengamal perubatan :

- i. Pengamal perubatan adalah saudara kepada setiap pengamal perubatan yang lain dan rakan sejawat di dalam satu misi yang mulia sebagai menyahut seruan Allah.
- ii. Pengamal perubatan bertanggungjawab ke atas penjagaan kesihatan sesebuah negara.
- iii. Pengamal perubatan bertanggungjawab merangka, merancang dan mengambil langkah serta mewujudkan budaya kerja yang berintegriti.

- iv. Pengamal perubatan mesti menghormati rakan sejawatnya.
- v. Pengamal perubatan bertanggungjawab untuk mengadakan rundingan jika kes perlu dirujuk kepada mereka yang lebih pakar.
- vi. Pengamal perubatan perlu berkongsi pengalaman, pengetahuan dan kepakaran kepada pengamal perubatan yang lebih muda.
- vii. Pengamal perubatan hendaklah sentiasa bekerjasama dan bersedia untuk membantu antara satu sama lain.
- viii. Pengamal perubatan perlu bekerja di dalam satu pasukan.
- ix. Kod etika ini meliputi kesemua peringkat di dalam bidang kesihatan.

b. Hubungan pengamal perubatan dengan pesakit:

- i. Segala tindakan yang diambil oleh pengamal perubatan adalah demi kepentingan pesakit.
- ii. Jadual perkhidmatan hendaklah disusun dan disesuaikan dengan pesakit bagi menjaga kebajikan dan keselesaan pesakit.
- iii. Memberi perkhidmatan tanpa mengira latar belakang pesakit.
- iv. Memberi perkhidmatan dengan penuh kesabaran, toleransi dan sikap bertimbang rasa.
- v. Sentiasa mematuhi piawaian profesion sebagai seorang pengamal perubatan.

4. Tanggungjawab dan Liabiliti

- 4.1 Pengamal perubatan muslim telah diajar, lulus dan memenuhi peraturan-peraturan dan undang-undang berkaitan.
- 4.2 Kes yang bermasalah hendaklah dirujuk kepada pakar yang berkaitan.
- 4.3 Di dalam mengurus sesuatu kes perubatan, seorang pengamal perubatan hendaklah bertindak sebaik mungkin, tanpa melakukan kecuaiian.
- 4.4 Pengamal perubatan adalah bertanggungjawab ke atas pesakitnya. Segala persetujuan atau penolakan pesakit ke atas cadangan rawatan yang diberikan hendaklah dibuat secara bertulis.

5. Penjagaan Nyawa Manusia

- 5.1 Nyawa manusia wajib dipelihara meliputi kesemua peringkat termasuk janin di dalam rahim. Pengguguran dibenarkan dalam keadaan yang mengancam nyawa (alasan perubatan) dan dibenarkan oleh syarak.
- 5.2 Seorang pengamal perubatan tidak boleh mengambil nyawa pesakit dalam keadaan apa sekali pun.
- 5.3 Pengamal perubatan bertanggungjawab memaklumkan kematian seseorang pesakit kepada warisnya.
- 5.4 Pengamal perubatan perlu memberikan kata-kata motivasi walaupun pesakit tidak ada harapan untuk sembuh.
- 5.5 Pengamal perubatan perlu jujur di dalam memberi rawatan kepada pesakit dengan kaedah ataupun pendekatan yang sesuai.

6. Pengamal Perubatan dan Masyarakat

- 6.1 Pengamal perubatan adalah ahli masyarakat yang berperanan menjaga dan memelihara taraf kesihatan masyarakat.
- 6.2 Pengamal perubatan memainkan peranan penting dalam mengambil langkah-langkah bagi mencegah penyakit serta memerangi tabiat yang merosakkan kesihatan.
- 6.3 Pencegahan penyakit dapat diatasi melalui pendekatan agama seperti kebersihan hati, mengawal dan menjauhkan dari merosakkan diri sendiri dan orang lain serta amalan gaya hidup sihat.
- 6.4 Pengamal perubatan perlu membuktikan kepercayaan masyarakat yang telah diberikan kepada mereka. Pengamal perubatan wajar diambil tindakan sekiranya mereka melanggar undang-undang dalam bidang profesionnya demi menjaga nama baik dalam amalan perubatan.

7. Pengamal Perubatan dan Kemajuan Biomedikal Moden

- 7.1 Islam tidak menghalang dalam melakukan penyelidikan sama ada kajian akademik atau kajian gunaan yang bertujuan untuk menyelesaikan sesuatu masalah.
- 7.2 Kebebasan penyelidikan sains diharuskan selagi mana ia tidak merosakkan dan membawa kemudaratan kepada manusia serta penganiayaan atau penyeksaan ke atas haiwan.
- 7.3 Profesion perubatan perlu dilibatkan bersama dalam perumusan dan pengeluaran fatwa dalam memastikan kesahihan hasil kajian.
- 7.4 Garis panduan mengenai perkara baru yang tidak disebut di dalam hukum atau mana-mana rujukan boleh dihasilkan selagi mana ia tidak bertentangan dengan al-Quran dan al-Sunnah.
- 7.5 Adalah menjadi tugas profesion perubatan untuk mendidik masyarakat, termasuk menggariskan peraturan mengenai prosedur, pengurusan dan teknik serta menentukan polisi keutamaan peraturan tersebut seperti pendermaan darah dan pendermaan organ.

8. Pendidikan Perubatan

- 8.1 Pendidikan perubatan ialah satu bidang ilmu bagi melatih dan menghasilkan Pengamal perubatan yang boleh menyumbang bakti kepada agama, bangsa dan negara semata-mata untuk mendapat keredhaan Allah.
- 8.2 Pengajar ilmu perubatan hendaklah menunjukkan teladan yang baik, memberi pengajaran dan bimbingan serta perhatian yang berterusan kepada pelajarannya.
- 8.3 Kod Etika Perubatan dalam Islam wajar dimasukkan di dalam silibus kurikulum perubatan. Kurikulum perubatan juga perlu memberi penekanan kepada perkara-perkara seperti berikut;-
 - i. Menekankan bahawa amalan perubatan adalah satu ibadat.
 - ii. Menjelaskan hukum-hakam dan ibadat yang berkaitan pelbagai

masalah kesihatan.

- iii. Memberi kefahaman berkaitan warisan perubatan dan sains tamadun Islam bagi mengembalikan zaman kegemilangannya.
- iv. Memberi penekanan bahawa keikhlasan merupakan elemen utama di dalam memberikan kesembuhan, pengubatan, menghilangkan tekanan dan sebagai pemangkin ke arah pemulihan kesihatan.

9. Peraturan Mendapatkan Rekod Perubatan Pesakit

- 9.1 Permohonan untuk mendapatkan rekod perubatan pesakit boleh dibuat kepada pengamal perubatan yang berkaitan, oleh pihak-pihak berikut :
 - 9.1.1 Pesakit;
 - 9.1.2 Seseorang yang telah diberikan kebenaran bertulis untuk memohon bagi pihak pesakit;
 - 9.1.3 Jika pesakit seorang kanak-kanak, seseorang yang mempunyai hak penjagaan ke atas pesakit tersebut ;
 - 9.1.4 Bagi pesakit yang tidak berupaya untuk mengurus perihal dirinya, sesiapa sahaja yang dilantik oleh mahkamah untuk menguruskan perihal pesakit tersebut ;
 - 9.1.5 Bagi pesakit yang telah meninggal dunia, saudara-mara/waris atau wakil peribadi pesakit.
- 9.2 Pesakit atau pemohon akan diberi akses dalam masa 28 hari dari permohonan diterima bagi mendapatkan rekod perubatan tersebut, dan diberi satu salinan rekod tersebut jika diminta. Tiada bayaran akan dikenakan selain daripada kos membuat salinan, kos penyediaan laporan perubatan dan kos penghantaran melalui pos sekiranya perlu.
- 9.3 Jika terdapat maklumat dalam rekod perubatan yang ditulis dalam terma-terma yang tidak difahami oleh pesakit atau pemohon tanpa penjelasan, suatu penjelasan hendaklah disediakan bersama rekod perubatan,

- 9.4 Akses tidak perlu diberikan pada mana-mana bahagian rekod jika pengamal perubatan berpendapat ia akan mendedahkan :
- 9.4.1 Maklumat yang boleh memudaratkan kesihatan fizikal atau mental pesakit atau individu lain.
 - 9.4.2 Maklumat yang diberikan oleh pesakit dengan tanggapan ia tidak akan didedahkan kepada pemohon.
 - 9.4.3 Maklumat yang diperolehi dari suatu keputusan pemeriksaan yang dilakukan beserta kebenaran pesakit dengan tanggapan ia tidak akan didedahkan.
- 9.5 Sekiranya permohonan dibuat oleh pesakit yang merupakan seorang kanak-kanak, akses tidak boleh diberikan melainkan pengamal perubatan berpuas hati yang pesakit berkeupayaan untuk memahami tujuan permohonan.

Sekiranya permohonan dibuat oleh seseorang yang bukan pesakit, pengamal perubatan mestilah memastikan sama ada pesakit telah membenarkan permohonan tersebut dibuat atau sekiranya pesakit tidak berupaya untuk memahami tujuan permohonan, memberikan akses merupakan usaha ke arah kebaikan pesakit juga.

- 9.6 Sekiranya seseorang berpendapat bahawa maklumat yang terkandung di dalam rekod perubatan yang diberikan adalah tidak tepat, maka permohonan boleh dibuat kepada pengamal perubatan untuk melakukan pembetulan di mana perlu.

Bagi permohonan seperti di atas, pengamal perubatan perlu :-

- 9.6.1 Melakukan pembetulan di mana perlu sekiranya pengamal perubatan berpuas hati bahawa maklumat yang ada adalah tidak tepat.

- 9.6.2 Membuat catatan dalam bahagian rekod yang mengandungi maklumat di mana maklumat tersebut dianggap tidak tepat, sekiranya pengamal perubatan tidak berpuas hati; dan
- 9.6.3 Dalam kedua-dua kes, memberikan satu salinan pembetulan atau catatan kepada pemohon tanpa sebarang bayaran.

10. Tugas Pengamal Perubatan Semasa Perang

- 10.1 Seorang pengamal perubatan muslim hendaklah menjaga dan mengubati orang yang sakit walau apa keadaan sekalipun.
- 10.2 Pengamal perubatan muslim tidak boleh mengkhianati atau mencederakan pesakit tanpa mengira latar belakang pesakit.
- 10.3 Penawaran perkhidmatan rawatan dan pengubatan mencakupi kawan atau musuh tanpa memilih kasih.